

**UNDANG-UNDANG KECIL**

**CETAKAN SEMULA**

**UNDANG-UNDANG KECIL KREMATORIUM  
(MAJLIS BANDARAYA SUBANG JAYA) 2007**

Mengandungi segala pindaan hingga 10 Disember 2020.



AKTA KERAJAAN TEMPATAN 1976

UNDANG-UNDANG KECIL KREMATORIUM  
(MAJLIS BANDARAYA SUBANG JAYA) 2007

---

SUSUNAN UNDANG-UNDANG KECIL

---

BAHAGIAN I

PERMULAAN

Undang-  
Undang  
Kecil

1. Nama dan permulaan kuat kuasa
2. Pemakaian
3. Tafsiran

BAHAGIAN II

SYARAT AM

4. Krematorium persendirian hendaklah mempunyai lesen
5. Permohonan dan fi
6. Larangan terhadap pembakaran mayat
7. Pengkremetan yang menyalahi undang-undang
8. Spesifikasi keranda
9. Waktu pembakaran mayat
10. Pelupusan abu
11. Daftar pembakaran mayat
12. Menyimpan rekod

BAHAGIAN III

LESEN BAGI KREMATORIUM PERSENDIRIAN

13. Lesen bagi krematorium persendirian
14. Tempoh sah lesen
15. Fi lesen
16. Mempamerkan lesen
17. Lesen tidak boleh dipindah milik, *dsbnya*.

BAHAGIAN IV  
PENGUATKUASAAN

Undang-  
Undang  
Kecil

18. Kuasa untuk memeriksa
19. Kuasa untuk membatalkan lesen, *dsbnya*.
20. Kuasa untuk menutup krematorium
21. Kuasa penangkapan
22. Kuasa menyita
23. Penalti am
24. Pendakwaan
25. Pengkompaunan kesalahan
26. Kuasa pegawai polis di bawah Undang-Undang Kecil ini
27. Pembatalan dan peruntukan peralihan

JADUAL

AKTA KERAJAAN TEMPATAN 1976

UNDANG-UNDANG KECIL KREMATORIUM  
(MAJLIS BANDARAYA SUBANG JAYA) 2007

PADA menjalankan kuasa yang diberikan oleh seksyen 98 dan 102 Akta Kerajaan Tempatan 1976 [*Akta 171*], Majlis Bandaraya Subang Jaya membuat dan menurut seksyen 103 Akta tersebut Pihak Berkuasa Negeri mengesahkan undang-undang kecil yang berikut:

BAHAGIAN I

PERMULAAN

**Nama dan permulaan kuat kuasa**

1. (1) Undang-Undang Kecil ini bolehlah dinamakan **Undang-Undang Kecil Krematorium (Majlis Bandaraya Subang Jaya) 2007**.
- (2) Undang-Undang Kecil ini mula berkuat kuasa pada 19 Julai 2007.

**Pemakaian**

2. Undang-Undang Kecil ini hendaklah terpakai hanya bagi kawasan pentadbiran Majlis Bandaraya Subang Jaya.

**Tafsiran**

3. Dalam Undang-Undang Kecil ini, melainkan jika konteksnya menghendaki makna yang lain-

“krematorium” ertinya krematorium awam dan krematorium persendirian;

“krematorium awam” ertinya mana-mana krematorium yang dimiliki, dipajak atau diselenggarakan oleh Majlis;

“krematorium persendirian” ertinya mana-mana krematorium selain daripada yang dimiliki, dipajak atau diselenggarakan oleh Majlis;

“Majlis” ertinya Majlis Bandaraya Subang Jaya;

“pemegang lesen” ertinya seseorang yang dilesenkan oleh Majlis untuk menjalankan, mengurus atau menyelenggarakan mana-mana krematorium persendirian di bawah Undang-Undang Kecil ini.

“Pihak Berkuasa Melesen” ertinya Datuk Bandar Majlis Bandaraya Subang Jaya, Setiausaha atau mana-mana pegawai yang diberi kuasa secara bertulis untuk mengeluarkan lesen oleh Datuk Bandar.

---

## BAHAGIAN II

### SYARAT AM

#### **Krematorium persendirian hendaklah mempunyai lesen**

4. (1) Tiada seorang pun boleh mengadakan, menyelenggarakan, menguruskan atau menjalankan mana-mana krematorium persendirian di mana-mana tempat, pegangan atau bangunan, tanpa lesen yang dikeluarkan oleh Pihak Berkuasa Melesen di bawah Undang-Undang Kecil ini.

(2) Mana-mana orang yang menyalahi peruntukan undang-undang kecil ini adalah melakukan suatu kesalahan dan apabila disabitkan, boleh dikenakan denda tidak melebihi dua ribu ringgit atau penjara selama tempoh tidak melebihi enam bulan atau kedua-duanya.

#### **Permohonan dan fi**

5. Pembakaran mayat tidak akan dibenarkan di mana-mana krematorium, melainkan setelah permohonan dibuat dalam borang yang disediakan oleh Pihak Berkuasa Melesen untuk tujuan itu, oleh mana-mana orang yang berikut-

- (a) waris kadim;
- (b) seorang yang diberi kuasa untuk membuat permohonan itu secara bertulis oleh waris kadim si mati;
- (c) wakil peribadi yang sah di sisi undang-undang;
- (d) mana-mana keluarga yang rapat dengan si mati;
- (e) mana-mana orang yang memperoleh permit dari polis atau pihak hospital; atau
- (f) mana-mana orang lain yang memberi sebab-sebab yang memuaskan Pihak Berkuasa Melesen atau pemegang lesen, yang mana berkenaan, mengapa permohonan itu tidak dibuat oleh mana-mana orang yang disebut di dalam perenggan (a) dan (b) di atas,

dan setelah menjelaskan bayaran seperti yang ditetapkan dalam Jadual.

#### **Larangan terhadap pembakaran mayat**

6. (1) Tiada pembakaran mayat seseorang boleh dibenarkan di mana-mana krematorium-

- (a) jika diketahui, dipercayai, atau disyaki bahawa si mati seorang Islam;
- (b) jika ada keraguan tentang sama ada si mati seorang Islam;

- (c) jika diketahui bahawa si mati telah memberi arahan atau petanda sama ada secara lisan atau bertulis supaya mayatnya tidak dibakar; atau
- (d) jika pengenalan si mati belum dipastikan.

(2) Pembakaran mayat tidak boleh dibenarkan di mana-mana krematorium sehingga diserahkan kepada Pihak Berkuasa Melesen atau pemegang lesen, yang mana berkenaan, suatu permit mengkebumi, yang dikeluarkan secara sah di sisi undang-undang berkenaan dengan si mati.

### **Pengkremetan yang menyalahi undang-undang**

7. (1) Seseorang yang mengkremet atau menyebabkan, mendapatkan atau membiarkan dikremet sesuatu mayat atau bahagian dari sesuatu mayat atau menyediakan sesuatu tempat untuk digunakan bagi mengkremet sesuatu mayat dalam atau atas mana-mana tempat yang bukan suatu krematorium yang diperuntukkan oleh Majlis atau bukan suatu krematorium yang dilesenkan oleh Majlis atau dalam atau atas mana-mana krematorium yang telah ditutup dengan perintah Majlis adalah bersalah atas suatu kesalahan.

(2) Mana-mana orang yang menyalahi peruntukan undang-undang kecil ini adalah melakukan suatu kesalahan dan apabila disabitkan, boleh dikenakan denda tidak melebihi satu ribu ringgit atau penjara selama tempoh tidak melebihi enam bulan atau kedua-duanya.

(3) Majlis boleh memohon dari Mahkamah suatu perintah bertulis yang dimeterai, mengarahkan orang itu dalam tempoh yang ditetapkan dalam perintah itu—

- (a) supaya memindahkan mayat atau bahagian dari mayat yang mengenainya kesalahan itu telah dilakukan dari tempat di mana ia telah dikremet ke suatu krematorium yang diadakan atau dilesenkan oleh Majlis;
- (b) supaya membuang apa-apa rangka bina yang didirikan bersalahan dengan peruntukan Undang-Undang Kecil ini dan memulihkan tanah itu kepada keadaan asalnya.

(4) Seseorang yang enggan atau cuai menurut perintah itu adalah bersalah atas suatu kesalahan dan boleh, apabila disabitkan, didenda tidak melebihi satu ribu ringgit atau dipenjarakan selama tempoh tidak melebihi enam bulan atau kedua-duanya dan denda tambahan tidak melebihi satu ribu ringgit bagi setiap satu hari selama tempoh kesalahan itu diteruskan selepas sabitan dan Mahkamah boleh memerintahkan supaya perintah itu dilaksanakan oleh Majlis atau perbelanjaan orang itu.

### **Spesifikasi keranda**

8. Sekiranya keranda digunakan untuk mengisi mayat yang dibakar, keranda tersebut hendaklah diperbuat daripada kayu dan menurut spesifikasi yang ditetapkan oleh Pihak Berkuasa Melesen atau pemegang lesen, yang mana berkenaan.

### **Waktu pembakaran mayat**

9. (1) Krematorium hendaklah dibuka untuk pembakaran mayat pada hari-hari dan masa seperti mana yang ditetapkan dalam Jadual.

(2) Tanpa menjejaskan perenggan (1), Pihak Berkuasa Melesen boleh membenarkan pembakaran dijalankan di mana-mana krematorium, pada waktu dan masa selain yang ditetapkan di dalam Jadual.

### **Pelupusan abu**

10. (1) Selepas setiap pembakaran dilakukan, abu si mati hendaklah diserahkan kepada orang yang telah memohon pembakaran mayat itu, jika ia menuntutnya.

(2) Jika dalam masa empat belas hari selepas notis diberi kepada orang yang telah memohon pembakaran mayat supaya mengambil abu itu telah tidak berbuat demikian atau tidak menunjukkan bahawa ia berhajat hendak menuntutnya, abu itu hendaklah ditanam atau ditaburkan di suatu tempat yang ditentukan oleh Pihak Berkuasa Melesen.

(3) Selagi abu si mati berada di dalam krematorium abu si mati itu hendaklah disimpan dan ditanda atau ditempatkan sewajarnya supaya boleh dikenali dengan jelas.

### **Daftar pembakaran mayat**

11. (1) Penjaga krematorium atau pemegang lesen krematorium persendirian hendaklah mengadakan suatu daftar pembakaran mayat, dalam bentuk yang ditetapkan oleh Pihak Berkuasa Melesen, dan khususnya hendaklah mengandungi perkara yang berikut-

- (a) nombor siri pembakaran;
- (b) tarikh pembakaran;
- (c) nama, nombor kad pengenalan, alamat tempat tinggal, pekerjaan, umur, jantina, agama, dan taraf perkahwinan si mati;
- (d) tarikh, tempat dan masa kematian si mati;
- (e) nama, nombor kad pengenalan, alamat dan pertalian hubungan di antara pemohon dengan si mati;
- (f) sebab-sebab kematian;
- (g) nombor rujukan permit mengebumi;
- (h) nama, jawatan dan alamat orang yang telah mengeluarkan kebenaran mengebumi; dan
- (i) cara bagaimana abu si mati telah dilupuskan.



(2) Butir yang dinyatakan dalam subperenggan (a) hingga (h) perenggan (1) di atas, hendaklah dicatatkan dalam daftar pembakaran mayat, selepas sahaja pembakaran dijalankan dan butir yang dinyatakan dalam subperenggan 1(i) hendaklah dicatatkan selepas sahaja abu itu dilupuskan menurut undang-undang kecil ini.

### **Menyimpan rekod**

12. (1) Penjaga krematorium atau pemegang lesen hendaklah menyimpan semua permohonan, permit dan dokumen lain berhubung dengan setiap pembakaran yang dibuat di krematorium, tidak kurang dari tempoh tujuh (7) tahun daripada tarikh pembakaran.

(2) Daftar pembakaran mayat atau mana-mana bahagian daripadanya dilarang dimusnahkan.

(3) Pemunya, pemegang amanah atau orang yang menjaga setiap kerematorium hendaklah membenarkan Pihak Berkuasa Melesen memeriksa daftar itu dan membuat salinan-salinannya atau cabutan-cabutan darinya.

(4) Mana-mana orang yang menyalahi peruntukan undang-undang kecil ini adalah melakukan suatu kesalahan dan apabila disabitkan, boleh dikenakan denda tidak melebihi lima ratus ringgit atau penjara selama tempoh tidak melebihi tiga bulan atau kedua-duanya.

## **BAHAGIAN III**

### **LESEN BAGI KREMATORIUM PERSENDIRIAN**

#### **Lesen bagi krematorium persendirian**

13. Pihak Berkuasa Melesen boleh mengeluarkan lesen, bagi mana-mana krematorium persendirian, menurut terma dan syarat sebagaimana yang difikirkan patut dikenakan.

#### **Tempoh sah lesen**

14. Sesuatu lesen yang dikeluarkan oleh Pihak Berkuasa Melesen di bawah Undang-Undang Kecil ini sah sehingga 31 Disember setiap tahun mulai tarikh ia dikeluarkan melainkan jika lesen digantung atau dibatalkan.

#### **Fi lesen**

15. Fi yang kena dibayar untuk lesen krematorium persendirian adalah sebanyak satu ribu ringgit setahun.

**Mempamerkan lesen**

16. (1) Setiap pemegang lesen hendaklah pada setiap masa, mempamerkan lesennya, di bahagian yang mudah dilihat pada premisnya atau di mana-mana tempat yang diarahkan oleh Pihak Berkuasa Melesen.

(2) Mana-mana orang yang menyalahi peruntukan Undang-Undang Kecil ini adalah melakukan suatu kesalahan dan apabila disabitkan boleh dikenakan denda tidak melebihi lima ratus ringgit atau penjara selama tempoh tidak melebihi enam bulan atau kedua-duanya.

**Lesen tidak boleh dipindah milik, dsbnya.**

17. (1) Mana-mana orang tidak boleh menyerah hak, memajak atau memindah milik lesennya kepada mana-mana orang.

(2) Mana-mana orang yang menyalahi peruntukan undang-undang kecil ini adalah melakukan suatu kesalahan dan apabila disabitkan boleh dikenakan denda tidak melebihi dua ribu ringgit atau penjara selama tempoh tidak melebihi satu tahun atau kedua-duanya.

**BAHAGIAN IV****PENGUATKUASAAN****Kuasa untuk memeriksa**

18. Tiada seorang pun, pada bila-bila masa, boleh menghalang atau mencegah mana-mana pegawai atau kakitangan Majlis yang diberi kuasa oleh Majlis, daripada memasuki untuk memeriksa mana-mana bahagian krematorium persendirian.

**Kuasa untuk membatalkan lesen, dsbnya.**

19. Pihak Berkuasa Melesen boleh menarik atau membatalkan, mana-mana lesen krematorium persendirian di mana pemegang lesen telah gagal untuk mematuhi mana-mana peruntukan Undang-Undang Kecil ini dan seterusnya memerintahkan supaya krematorium persendirian itu ditutup kepada orang awam.

**Kuasa untuk menutup krematorium**

20. (1) Jika pada bila-bila masa Pihak Berkuasa Melesen berpendapat bahawa—

(a) sesuatu krematorium berada dalam sesuatu keadaan yang boleh mendatangkan bahaya kepada kesihatan orang yang tinggal di kawasan sekitarnya; atau

(b) krematorium itu atau mana-mana bahagian daripadanya—

- (i) adalah mudarat atau tak baik atau tak layak untuk digunakan sebagai suatu krematorium;
- (ii) tidak boleh lagi digunakan untuk mengkremet orang mati tanpa mendatangkan bahaya kepada kesihatan awam; atau
- (iii) adalah digunakan bersalahan dengan syarat-syarat lesen,

Pihak Berkuasa Melesen boleh memerintahkan supaya krematorium itu atau mana-mana bahagiannya itu ditutup atau boleh membatalkan lesennya, mengikut mana yang berkenaan, dan selepas daripada itu adalah menyalahi undang-undang menggunakan yang demikian sebagai suatu tempat bagi mengkebumikan atau mengkremet mayat.

### **Kuasa penangkapan**

21. (1) Datuk Bandar atau mana-mana pegawai diberi kuasa boleh menangkap tanpa waran mana-mana orang-

- (a) yang semunasabahnya dipercayai olehnya telah melakukan suatu kesalahan di bawah Undang-Undang Kecil ini; atau
- (b) yang enggan memberikan nama dan alamatnya apabila diminta atau jika ada sebab untuk meragui ketepatan nama dan alamat yang diberikan.

(2) Seseorang yang ditangkap di bawah undang-undang kecil ini hendaklah dibawa ke balai polis dan hendaklah dibawa ke hadapan seorang Majistret dalam masa dua puluh empat jam, melainkan jika sebelum dari masa itu nama dan kediamannya yang sebenarnya telah dapat ditentukan, dan dalam hal yang sedemikian orang itu hendaklah dilepaskan dengan serta-merta apabila dia menyempurnakan suatu bon untuk hadir di hadapan seorang Majistret jika dikehendaki sedemikian.

(3) Apabila mana-mana orang sedemikian dibawa ke hadapan seorang Majistret, Majistret itu boleh sama ada menghendaki dia menyempurnakan suatu bon, dengan atau tanpa penjamin untuk hadir di hadapan seorang Majistret sekiranya dikehendaki, atau boleh memerintahkan supaya dia ditahan dalam jagaan sehingga dia dapat dibicarakan.

### **Kuasa menyita**

22. (1) Mana-mana pegawai diberi kuasa boleh menyita atau mengalihkan apa-apa barang atau benda yang menyalahi Undang-Undang Kecil ini dengan risiko ditanggung oleh pemunya.

(2) Apa-apa benda atau barang yang disita di bawah perenggan (1) ini adalah daripada jenis yang mudah rosak atau yang mengikut sifatnya lekas rosak atau jika penjagaan benda atau barang itu melibatkan perbelanjaan dan kesusahan yang tidak munasabah, atau dipercayai akan membahayakan orang ramai, pegawai diberi kuasa boleh mengarahkan supaya benda atau barang itu dilupuskan mengikut cara yang ditentukan oleh Majlis.

(3) Mana-mana orang yang menuntut apa-apa benda atau barang selain benda atau barang yang disita di bawah perenggan (2), boleh menuntut benda atau barang tersebut daripada Majlis dalam tempoh minima tujuh hari bekerja atau maksima satu bulan dari tarikh benda atau barang itu disita tertakluk kepada apa-apa syarat dan pembayaran yang dikenakan oleh Pihak Berkuasa Melesen.

(4) Sekiranya, tiada apa-apa tuntutan dibuat selepas tempoh tiga puluh hari Majlis bolehlah melupuskan benda atau barang itu mengikut cara yang ditentukan Majlis dan apa-apa hasil yang diperolehi hendaklah dikreditkan kepada Kumpulan Wang Pihak Berkuasa Tempatan.

(5) Datuk Bandar atau mana-mana pegawai diberi kuasa tidaklah bertanggungjawab kepada mana-mana orang bagi apa-apa kemerosotan, walau apa pun sebabnya, dalam kualiti apa-apa benda atau barang yang disita di bawah Undang-Undang Kecil ini.

### **Penalti am**

23. Seseorang yang melakukan suatu kesalahan di bawah Undang-Undang Kecil ini yang baginya tiada penalti diperuntukkan dengan nyata boleh apabila disabitkan, didenda tidak melebihi dua ribu ringgit atau dipenjara selama tempoh tidak melebihi satu tahun atau kedua-duanya, dan dalam hal sesuatu kesalahan yang berterusan boleh sebagai tambahan didenda tidak melebihi dua ratus ringgit bagi setiap hari kesalahan itu terus dilakukan.

### **Pendakwaan**

24. Tiada pendakwaan boleh dimulakan terhadap kesalahan di bawah Undang-Undang Kecil ini kecuali oleh atau dengan keizinan Pendakwa Raya.

### **Pengkompaunan kesalahan**

25. (1) Datuk Bandar, Setiausaha atau Pegawai Undang-Undang Majlis boleh mengkompaun mana-mana kesalahan yang dilakukan di bawah Undang-Undang Kecil ini dan ditetapkan sebagai kesalahan yang boleh dikompaun dengan membuat suatu tawaran bertulis kepada orang yang disyaki telah melakukan kesalahan itu untuk mengkompaun kesalahan itu apabila dibayar kepada Majlis sejumlah wang yang tidak melebihi satu ribu ringgit bagi kesalahan itu dalam tempoh yang dinyatakan dalam tawaran itu.

(2) Sesuatu tawaran di bawah perenggan (1) boleh dibuat pada bila-bila masa selepas kesalahan itu dilakukan tetapi sebelum apa-apa pendakwaan baginya dimulakan, dan jika jumlah yang dinyatakan dalam tawaran itu tidak dibayar dalam tempoh yang dinyatakan dalam tawaran itu atau dalam apa-apa tempoh lanjutan sebagaimana yang dibenarkan oleh Datuk Bandar atau Setiausaha atau Pegawai Undang-Undang Majlis, pendakwaan terhadap kesalahan itu boleh dimulakan pada bila-bila masa selepas itu terhadap orang yang kepadanya tawaran itu telah dibuat.

(3) Jika suatu kesalahan telah dikompaun di bawah perenggan (1), tiada pendakwaan boleh dimulakan selepas itu berkenaan dengan kesalahan itu terhadap orang yang kepadanya tawaran untuk mengkompaun telah dibuat dan apa-apa benda yang disita berkaitan

dengan kesalahan itu hendaklah dilepaskan, tertakluk kepada apa-apa terma dan syarat yang ditetapkan.

(4) Kesemua wang yang diterima di bawah undang-undang kecil ini hendaklah dibayar kepada kumpulan wang yang diwujudkan di bawah mana-mana undang-undang yang berhubung dengan kerajaan tempatan.

#### **Kuasa pegawai polis di bawah Undang-Undang Kecil ini**

26. Tiada apa-apa jua yang terkandung dalam Undang-Undang Kecil ini boleh mengurangkan kuasa seseorang pegawai polis untuk menyiasat apa-apa kesalahan di bawah Undang-Undang Kecil ini.

#### **Pembatalan dan peruntukan peralihan**

27. Apa-apa notis, perintah, kompaun, lesen, atau dokumen yang telah dibuat atau dikeluarkan di bawah Undang-Undang Kecil yang dibatalkan hendaklah, setakat yang notis, perintah, kompaun, lesen atau dokumen itu selaras dengan Undang-Undang Kecil ini, terus berkuat kuasa sehingga dibatalkan atau digantikan oleh Undang-Undang Kecil ini.

JADUAL

UNDANG-UNDANG KECIL KREMATORIUM  
(MAJLIS BANDARAYA SUBANG JAYA) 2007

[undang-undang kecil 5 dan 8]

Bayaran bagi setiap pembakaran mayat

<i>Hari / Waktu</i>	<i>Bayaran yang dikenakan bagi satu mayat</i>
Isnin hingga Ahad termasuk hari kelepasan am.  9.00 pagi hingga 5.00 petang	RM 250.00

Dibuat oleh Majlis Perbandaran Subang Jaya dalam mesyuaratnya pada 30 Mac 2007.

**ADNAN BIN HAJI MD. IKSHAN**  
*Yang Dipertua*  
*Majlis Perbandaran Subang Jaya*